

17/06/1997

Media Singapura putar belit kenyataan Zahid

JOHOR BAHRU, Isnin - Ketua Pergerakan Pemuda Umno, Datuk Ahmad Zahid Hamidi meminta maaf kepada Singapura hanya atas kata-kata kesat yang tertera di sepanduk dalam protes Pemuda Umno Johor terhadap Menteri Kanan republik itu, Lee Kuan Yew.

Sehubungan itu, Ahmad Zahid bukannya memohon maaf atas perbuatan Pemuda Umno Johor menunjuk perasaan ketika menyambut ketibaan Perdana Menteri, Datuk Seri Dr Mahathir Mohamad di Lapangan Terbang Sultan Ismail, Senai pada 13 Mac lalu.

Ketua Pergerakan Pemuda Umno Johor, Ariss Samsuddin membuat penjelasan itu selepas mendapatkan gambaran sebenar daripada Ahmad Zahid sendiri dalam satu pertemuan Sabtu lalu.

Beliau berkata, permohonan maaf yang dibuat oleh Ahmad Zahid hanya membabitkan perkataan kesat yang tertulis di sepanduk ketika demonstrasi membantah kandungan afidavit Lee yang menghina Johor.

"Dia (Zahid) bukan memohon maaf bagi pihak Pemuda Johor yang terbabit dalam demonstrasi berkenaan," katanya ketika dihubungi hari ini.

Berikutan itu, Pemuda Umno Johor menyifatkan permohonan maaf dinyatakan Ahmad Zahid di Singapura baru-baru ini sengaja diputarbelitkan oleh media republik berkenaan.

(END)